

天一閣藏明代方志選刊續編



嘉靖寧州志（江西）

天一閣藏明代方志選刊續編
四三

上海書店

寧州志序

夫載籍者聖賢之心天下後世之耳目也世之興衰
治亂得失人之善惡是非邪正率於是以有攷焉故
孔子嘗曰夏禮吾能言之杞不足徵殷禮吾能言之
宋不足徵顧文獻之不足歟孟子曰晉之乘楚之檮
杌魯之春秋一也皆史也今之郡縣蓋古之侯邦其
各有志志即史也乘檮杌春秋名異而實同也志於
是不亦重且大哉吾寧自唐貞元間割分武寧八鄉

置分寧縣宋因之元至元間更爲寧州

國初改寧縣弘治間復爲寧州歷世久而載籍無稽宋
徐子筠始爲脩水志十卷燬于兵燹成化中縣尹蕭
君光甫以黃梅縣博三山龔君章纂爲縣志四卷距
今幾七十年弘治中都憲來軒周公作脩水備考二
十卷距今且三十年有畸矣志既多畧備考亦未成
書君子故不能無杞宋之遺憾焉嘉靖庚子予按閩
寓京邸大司寇泉坡翁屬以家乘事竣出脩水備考

示欲終來軒公之所未集也時翁䟽休致予在逆旅
既再四訂盟越嗣歲壬寅五月予家居翁復致簡州
守陸侯統命使馳書幣相速以行宿諾未酬而新命
繼至予何敢辭按脩水備考來軒公數十年精力授
之於翁凡就事紀事不立條格悉以諸舊而續所未
至間有先後異同蓋事以類宜文以繁殺皆翁所預
裁之前此郡守謝公存儒已序其槩矣今予特從而
繙閱之耳若校正則郡博袁君大綸副博陳君萬善

林君惠揚君相采輯則庠生陳子由極查子憲元余
子鏜劉子曾榮子奕世周子希夔時又聞斷陳侯令
以公檄視篆至州守萬侯民望以欽取簡命至節判
李侯松以侍御左遷至一時英賢咸集以文相長尤
多貳守余侯瀛幕相周君節右翼梓成暹耻也徒館
穀奚庸爲筆硯哉烏乎志也信史也由一郡而達之
天下也鑒戒存焉詩曰周雖舊邦其命維新俾寧之
舊邦生於斯長民於斯踵賢錫類而以勸以懲譽髦

起於名世政教兼而復古山川草木蔚然改觀則寧
之爲治信乎其亦新矣嘉靖癸卯夏五月既望南昌
龔暹序

寧州志序

夫志曷爲者也爰以闡幽發微稽績攷履以示軌物
焉者也疇志之大司冠泉坡公志之也泉坡公述紹
僖敏公之弘烈邇監康惠公之遺緒是庸集厥成焉
爾嘉靖庚子余小子來守豫章閱郡志疏蕪方謀脩

輯適覽厥籍作而嘆曰嗟乎茲志也其猶有古之道也夫古昔皇墳肇析帝典攸彰王國版圖胥有紀載內史登策書外史述方物彬彬乎盛矣自方域變而郡縣置經制亡而構杌興於是乎邦國之志紛然陳矣然而纂組刺繡豐于詞或失則離詰屈曼衍繆于體或失則誕比事類物損于真或失則譎曲引旁核戾于正或失則衰茲四者君子奚取焉以予觀于茲志其猶有古之道也夫是故星野列而仰觀玄渾可

徵也形勝昭而俯察黃儀可徵也官司嚴而顯觀人
理可徵也秩祀明而幽綜神教可徵也人物賁而遠
乎賢範可徵也志有五韙而庶幾乎古其諸內史外
史氏之流亞也與余又聞之天下有道行有枝葉
否則辭有枝葉也已昔者周公克成厥始召公克
承厥中而畢公以老成典刑保釐東土政敦德義
辭尚體要故曰公其惟時亦有無疆之聞茲而泉
坡之志茲土也使守茲土者體而行焉產茲土者

嗣而興 則不徒辭枝葉而行寔本根之雖爲政
于天下無難者余小子亦預有榮爾矣豈直曰志
寧而已乎

嘉靖癸卯春正月之吉

賜進士出身中憲大夫雲南按察司副使蒲圻謝存儒
書

脩水備考序

弘治己未予爲脩水備考未就東白張公聞之走入

假觀明日以書來云燈下批閱深得著述體恨不得
即與共成吾南昌郡志也公

三朝史官兼以文學擅名天下顧予何人敢當此語哉
明年庚申奉

命慮囚湖南公亦以憂歸又明年壬戌春見公於洪都
樂樂衰經中公復曰郡志非子不可揚方震政務方
殷子幸毋多讓予辭避不敢當是年公亦起復之京
寓高坡邸舍遂以郡志四十有三卷送脩乃郡守祝

瀚徵儒生羅甫所爲而梓行者公已序其前矣予曰
業已成矣復脩何爲公不云所以乃曰元禎所欠者
茲事今付于元禎死可以見鄉先正於地下矣季鳳
不得已受之季鳳官刑曹刑曹劇地也劇則不暇他
爲然亦不敢負焉多方假書纂之垂成俄陞四川按
察副使整飭建昌兵備雖道路險遠負之以行無何
公即世矣明年丁卯予以孽瑾矯

詔裁革還家乃與二三同志議成其事尋爲童行者私

持去僅存其半獨全者脩水備考而已撫卷間道義
一念幽明兩途得無所負乎哉悲夫公銳然欲表章
先獻而予不能成之且使已纂者廢缺公之志荒矣
此予所以因命吏人謄寫予脩水備考而益歎予之
有負於公也郡志原本幸存謹藏于家俟他日予告
苟得不死則竭吾力畢公志焉庶可以見公於地下
於乎脩水爲郡屬州備考其獯羊也故特序東白之
言於編首以識予不敢終負之意脩江主人周季鳳

公儀序

讀脩水備考因書其後

作史與州縣之志孰難予則謂作州縣之志者爲難
衆人之志州縣與鄉人自志之者孰難予則謂鄉人
自志之者爲難國史天下之書也事變繁於煙海官
人雜於草木兼收實錄以俟後世使操筆得人一經
點竄便爲佳史乃若州縣之地封域隘小事寡缺
盡實書之則類於案牘而不足以傳世有意於補飾

則類於傳竒而反滋世人之疑正如三家之市而爲
燕射之禮誠有難乎其爲容者况以鄉人而自志之
人物高下孰非其父元俗習朴惡孰非其所當隱諱
孔子居鄉黨似不能言而吾壘壘於人物俗習之間
豈禮之當哉然槩無抑揚則又非史志之體故必能
別善惡於渾涵寓竒辯於平訥如夫子之作春秋法
所當直在亂賊讀之而不敢怒法所當隱在敵國怨
家而不敢以爲諛至是庶爲得體而豈可以大聖望

於人人哉予謂莫難於志州縣尤莫難於鄉人之自
志者蓋論其體也同年周君公儀創爲脩水備考嘗
試觀其草類例精嚴詞意忠厚事關大務其疑小者
不書前輩善行鋪叙無遺其不善者自不可掩所謂
別善惡於渾涵寓竒辯於平訥者在斯志乎予定文
有年謂公儀困於法吏豈知其餘地之游沛然至是
哉公儀出今寧州以都憲公爲之先以黃山谷諸先
生爲之前哲公儀之得將在是乎不然豈其讀春秋

筆削之法而深自有悟乎他日州縣之志有聞于天下與國史同信者必此脩水備考也必此脩水備考無疑也金谿吳世忠序

脩水備考序

脩水備考寧都憲來軒周公之所作也寧南昌屬州在春秋爲艾子之國迄今餘數千年寢熾而盛稱雄豫章久矣其間人物故實無所託而傳與幸而存者九幾郡志附載莫可詳州舊志四卷又多遺謬則寧